

LIGJ
Nr. 8437, datë 28.12.1998

PËR AKCIZAT NË REPUBLIKËN E SHQIPËRISË

Në mbështetje të neneve 81, 83 pika 1 dhe 155 të Kushtetutës së Republikës së Shqipërisë, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Neni 1

Akcizat janë tatime për një numër të kufizuar mallrash për konsum masiv, të brendshëm, pavarësisht nëse prodhohen brënda vendit apo importohen.

Neni 2

Personat juridikë a fizikë, vendas dhe të huaj, që i nënshtrohen këtij tatimi, janë prodhuesit dhe importuesit e mallrave të tatueshme me akcizë.

Neni 3

Mallrat që tatohen me akcizë, përqindjet e akcizës dhe vlera e akcizës për një pullë janë si vijon:

	Përqindja e akcizës	Vlera e akcizës për një pullë
A. Duhan e prodhime duhani		
Duhan për konsum	60	
Cigare		
Kategoria I		15 lekë paketa
Kategoria II		15 lekë paketa
Kategoria III		11 lekë paketa
Puro		2 240 lekë për kilogram
B. Pije alkoolike		
.. Birrë	50	
.. Verë me vlerë deri në 300 lekë litri		50 lekë litri
.. Verë me vlerë mbi 300 lekë litri		150 lekë litri
.. Raki		120 lekë litri
.. Konjak, uzo, votkë, fërnët, ponç, likerna, wiski, campari, rum, martini dhe pije të tjera alkoolike, me vlerë mbi 400 lekë litri		400 lekë litri
.. Konjak, uzo, votkë, fërnët, ponç, likerna, wiski, campari, rum, martini dhe pije të tjera alkoolike, me vlerë deri 400 lekë		80 lekë litri
C. Pije joalkoolike, freskuese		

e të tjera	5	
Ç. Ujë mineral natyror, Ujë mineral i gazuar, ujë në shishe	5	
D. Kafe		20

DH. Nënproduktet e naftës

.. Benzinë deri ne 89.9 oktan	77
.. Benzinë 90 oktan e lart	90
.. Benzinë pa plumb	90
.. Gazoil	50
.. Vajguri	80
.. Valvolinë	50
.. Vajëra lubrifikante, të të gjitha llojeve dhe grasove	50
.. Solar, mazut	5
.. Të tjera (koks, naftë, bitum, toluol squfur, ksilol, solvent	20

Prodhimi dhe importimi i çdo lloj nënprodukti naftë, që nuk përfshihet në shkronjën "DH" të këtij neni trajtohet me akcizë 90 për qind.

Përfshihet nga akciza gazi i lëngët për përdorim në popullsi.

Neni 4

Për mallrat e prodhuara në vend, llogaritja e akcizës bëhet në bazë të çmimit mesatar para tatimit, sipas përcaktimit të Institutit të Statistikës një herë në tre muaj dhe metodologjisë së dhënë nga Ministria e Financave. Për nënproduktet e naftës, llogaritja e akcizës bëhet në bazë të çmimeve të brendshme, të përcaktuara nga organet shtetërore.

Për mallrat e importuara, përmendur në nenin 3 të këtij ligji, akciza e të cilave është me përqindje, llogaritja e akcizës bëhet në bazë të vlerës doganore plus taksën doganore.

Neni 5

Akciza derdhet në buxhetin e shtetit:

- për mallrat e prodhuara në vend, brenda 5 ditëve nga çasti kur prodhuesi i lëshon faturën për shitje blerësit, në vlerën e së cilës shton akcizën dhe e mbledh akcizën nga blerësi për llogari të buxhetit të shtetit, me përjashtim të rastit të mallrave akciza e të cilave paguhet me pullë fiskale;
- për mallrat e importuara, në çastin e pagesës së detyrimit të akcizës dhe të taksës doganore në doganë, me përjashtim të rastit të mallrave akciza e të cilave paguhet me pullë fiskale;
- për prodhimet, akciza e të cilave paguhet me pullë fiskale, në çastin e blerjes së pullave, nga subjektet që kanë bërë kërkesë.

Neni 6

Në rastin e eksportimit të mallrave të parashikuara në nenin 3 nuk llogaritet akcizë dhe nuk jepet asnjë rimbursim.

Neni 7

Pagimi i akcizës bëhet vetëm një herë nga importuesi ose prodhuesi i mallrave. Çdo shitje e mëtejshme e mallrave të tatueshme me akcizë nuk i nënshtrohet pagimit të saj.

Neni 8

Prodhuesit dhe importuesit e mallrave, që taten me akcizë, dhe organet doganore detyrohen të mbajnë llogari të veçantë, të plotësojnë dhe të dërgojnë në organet tatimore deklaratën periodike, mujore për akcizat e realizuara e të derdhura, brenda datës 10 të muajit pasardhës, si dhe çdo informacion tjetër të kërkuar nga Ministria e Financave.

Neni 9

Quhen shkelje të këtij ligji:

1. Fshehja dhe falsifikimi i të dhënave dhe i dokumenteve bazë për llogaritjen e akcizave.
2. Mbajtja e gabuar e llogarive kontabël për akcizat.
3. Derdhja me vonesë e akcizave në buxhetin e shtetit.
4. Mosparaqitja në kohë e deklaratës periodike, mujore për akcizat e realizuara.

Neni 10

Shkeljet e parashikuara në nenin 9 të këtij ligji, kur nuk përbëjnë vepër penale, formojnë kundërvajtje administrative dhe dënohen me gjobë si vijon:

- Fshehja dhe falsifikimi i akcizave, përveç detyrimit të pagimit në masën njëqind për qind të akcizës së fshehur ose të falsifikuar, dënohet me një gjobë të barabartë me pesëfishin e shumës së akcizës së fshehur ose të falsifikuar .
- Mbajtja e gabuar e llogarive kontabël , me gjobë nga 5 000 (pesë mijë) deri në 10 000 (dhjetë mijë) lekë.
- Derdhja me vonesë e akcizave në buxhetin e shtetit me gjobë 0.50 për qind të detyrimit të papaguar për çdo ditë vonesë.
- Mosparaqitja në kohë e deklaratës periodike, mujore për akcizat e realizuara, me gjobë 6 000 (gjashtë mijë) deri në 8 000 (tetë mijë) lekë.
- Procedurat e ankimit dhe të ekzekutimit të masës administrative bëhet në përputhje me ligjin nr.7681, datë 4.3.1993 “Për administrimin e tatimeve dhe taksave në Republikën e Shqipërisë” .

Neni 11

Ngarkohen Ministria e Financave dhe Banka e Shqipërisë të marrin masa për prodhimin e pullave për artikulat e duhanit dhe të pijeve alkoolike.

Neni 12

Ligji nr.8348, datë 20.5.1998 “ Për akcizat në Republikën e Shqipërisë” shfuqizohet.

Neni 13

Ngarkohet Ministria e Financave për nxjerrjen e akteve nënligjore, në bazë dhe për zbatim të këtij ligji.

Neni 14

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.2288, datë 31.12.1998 të Presidentit të Republikës së Shqipërisë, Rexhep Meidani